

西事江略

一
八
冊
函

西事彙略卷六

迤西陸防各軍總司令部編輯

政務上

建置

軍都督府鑒榆機關部遵於十月廿六日裁撤總理由雲龍暨參事范宗瑩等親交到木質關防一顆摺一扣冊三本案卷五十八宗由藩點收源到後會飭將衛兵二百五十名妥爲遣散所有該部截留鹽款即於裁撤日截止除用外餘存壹萬有零並同槍械照原領數目飭交餉械分局點收報部查核用款飭自行核實造冊報銷交到木關防卽行銷毀合肅電陳藩根源叩東印

爲通飭遵照事照得大理迤西機關部實因反正之際人心驚惶由各紳等稟請暫設借資維繫今大局既定人心已安若長此因循不改實於行政司法權限多有侵越紛歧昨奉軍都督府電飭裁撤業已轉飭遵照辦理在案至各府廳州縣所設分部其初亦本爲維持地方起見惟士紳之中賢愚不一竟有假該部名義殺人歛財如永北之

劣紳黎元和者實不足以維持秩序而反足以害治安自應將各屬所設分部概行裁撤以歸劃一並將該部以前所頒文告一律取銷除電飭遵照外合行札飭爲此仰該

府廳州縣

即便遵照並轉飭所屬官紳一體遵照自宣告裁撤之後如有無賴匪徒借名義以侵治權假文告以淆觀聽一經覺察或被告發定行分別重懲不貸地方官扶同隱匿或通同一氣舞弊營私尤當加等治罪本總司令言出法隨慎勿視爲具文也凜之愼之切切特札右札迤西各府廳州縣官

省城軍都督府鈞鑒永北廳屬地面寥闊川滇接壤匪徒時有滋擾現值大局粗定川匪土匪尤易竄發非有大員坐鎮不足以資鎮懾而保治安擬請將鶴麗鎮暫移該處鎮廳相輔爲理必能漸臻安謐根源行將計畫援川永北爲必經之道鎮移該處亦可藉爲後援藩根源彥會商意見相同是否可行乞飭核議示復遵辦藩根源彥叩江印大理李師長趙樾老丁碩翁鑒江電悉鶴麗鎮移駐永北藉資坐鎮而保治安蓋籌甚

善卽可定計由碩翁前往佈置惟取道永北援川一層尙須計議聞甯遠一路道路艱險軍資缺乏不利大軍行進宜先派員前往偵察再定區處鐫歌印

省城軍都督府鈞鑒委署永平縣李令治現已到任視事查該屬曲硐地方地當衝要爲榆永往來孔道源本日駐此審察情形擬飭該令暫駐曲硐俾因應一切得以迅赴事機合肅稟聞師長根源叩養印

省城軍都督府鈞鑒查永平縣署原駐老街前源與趙巡按到永該縣全體士紳以曲硐爲往來必由孔道反正之後回漢互生疑忌匪徒出沒無常若縣署仍設老街僻處一隅照料實有難周請將縣署移駐曲硐當經根源電陳准在案源昨旋抵該縣復詳細體察情形曲硐地方最爲扼要縣治改建於此化除頑梗撫字人民均爲適當惟移署必須移監修理非欸莫辦永平素稱貧瘠又經此次匪禍民生益敝財政益絀若就地設法籌措實屬無計掘羅查該縣牲稅年約收獲錢壹仟貳叁百串易銀陸柒百金擬將此款停解一年卽以爲修理縣署及監獄之費李令辦事結實卽責令該令經修

監獄必期堅固不碍衛生縣署足敷辦公不求廓大一年稅入必能敷用設有不敷再由李令設法籌補公家既不大損民間可免重累誠爲兩便鈞府軫念民瘼必蒙俯如所請倘邀俞允卽乞飭部知照伏候示遵師長根源謹叩東印

永平李令鄭中隊長覽冬電悉傳守銘素行種種不法早經訪聞此次在永在騰所接訴呈不下十餘張尤屬罪無可宥茲據該令等會電稟請從寬懲辦姑准如所請貸其一死繳銀一仟兩贖罪此項銀兩卽作爲修理該縣監厥欸項此復總司令部冬印
省城軍都督府鈞鑒騰越一缺地處極邊內政外交均關重要昨以到榆代表稱前委唐璆不能勝任當肅元電稟陳並擬請升廳爲府籌辦一切隨奉篠電開騰越唐丞希卽詳加考察如不勝任遺缺就近遴委至擬改該廳爲府并添設州縣極佩卓見統望於到騰後察核擬議妥速籌辦詳細示知等因源藩到騰後詳加攷察唐璆實屬難勝繁劇且力辭面懇回省查前駐蠻允交涉委員趙開堦才具尙可謹遵前次酌委騰龍兩廳電諭委令署理并升廳爲府復舊名爲騰衝府騰越改爲縣名照案由府兼攝以

崇體制將來籌辦改流添設縣治庶可以資統率而專責成藩他日出巡所有關務外交亦便與駐騰英領直接辦理公費仍照原定騰越廳數目支給不必再加除頒印給委并將籌辦情形隨時稟陳外合肅電稟乞賜查核飭部備案再此案本應先行請示俟覆到遵辦因前曾奉安速籌辦之電觀察事機亦刻不容緩故會商便宜先行更名委趙署理卽飭本日視事至道廳兩署案卷均被干崖刀土司安仁乘機盜燬合併陳明根源藩謹叩江印

一件據漾濞永蒙兩屬士紳施士英等稟爲呈明事勢懇恩曲全以期政理民安事由

稟及條陳均悉漾濞爲永蒙浪穹雲龍四屬交界插花地生齒繁衍山川險要改設縣治以便治理自屬可行惟事關改建造端宏大頭緒紛繁凡區域之劃分村寨之支配經費之籌備無不當先事攷求該士民等生長其間留心政治必早有灼見真知務望詳加商確繪圖貼說並擬辦事部分手續章程再由本總司令會同趙巡按使轉飭各

該廳州縣詳加核議分別辦理庶可有利無弊長治久安核閱各條第一條裁併劃分自係第一要義第二條暫委知縣一員駐紮辦事亦尙可行第三條請發給快槍百枝以備緝捕應候派員後酌奪第四五條提撥營田堡租充作教育自治經費應候設官定後由官紳商酌稟承辦理第六七兩條收糧收稅現已定議由紳監官收儘征儘解該處未設縣以前仍由各該廳州縣派人征收所擬舉紳代征代解與通案不符應毋庸議仰即知照此批

一件據蒙化廳蒙三約士民楊仁修等呈爲地面插花有礙治理懇請併歸彌渡縣以從民便事由

呈悉三約地方隔蒙遠而距彌近將來改設縣治將此地劃入衡情論勢似屬可行仰候發交蒙化廳會同趙州雲南縣核議具復再行酌奪可也仰即知照此諭

省城軍都督府鈞鑒查彌渡通判缺專管緝捕而地方與趙州蒙化雲南縣三處接壤華離交錯界線不分錢糧互有隱匿詞訟互相歧控事煩責重新政紛紜斷非一通判

分防所克勝任前該處紳商稟准改設縣治實爲握要以圖擬請設縣試辦飭卽督紳會同趙蒙雲官紳將各插花地段劃分疆界分撥錢糧繪圖貼說稟候飭軍政部分飭各司核議規定實行又漾濞地居要衝隸於蒙化又與永平浪穹雲龍四處插花且距廳縣城四五站不等官民隔閼呼應不靈現經騰永兵亂後撫綏安輯尤貴得人巡檢微員難資鎮攝擬請亦改設知縣於四屬插花地面支配劃分仍會同四屬官紳公同辦理稟候分飭妥議核定飭遵茲彌渡一缺查有前署雲龍州黎民蒸堪以委令試辦漾濞俟奉電復後再遴員請委惟查大理府屬已有七州縣彌渡漾濞擬請均隸蒙化便於聯絡以資治理是否有當伏乞示遵師長根源巡按使藩卬魚印

李師長趙巡按使鑒魚電悉彌渡漾濞兩缺擬請改設縣治自係爲劃分疆域便於治理起見惟該兩處距省較遠其地段如何交錯情形如何不便實難懸揣未便遽行規定應候行司轉飭繪圖附說呈候核奪後再行會商妥議分劃彌漾均隸蒙化管轄於程途交通是否適中希卽一併詳覆爲盼軍都督府眞印

省城軍都督府鈞鑒真電悉彌渡距蒙化一日程漾濞距蒙化二日程彌爲蒙屬插花地漾本蒙屬分防程途交通均尙適中彌議改縣已歷三載舊曾飭大理府踏議擬繪圖貼說省署想有案可稽漾濞爲榆永門戶地險而衝源本有改縣之議蒙永兩屬士紳亦兩次聯名呈請當批飭該紳等將分劃支配籌備各事宜會商妥議分別條陳俟到卽發由各該廳州縣官紳併同覆核辦理再行詳覆根源藩叩元印

省城軍都督府鈞鑒查彌渡漾濞壤地華離不便治理議請劃併改設縣治去冬曾經電呈奉復並飭該兩屬官紳將分劃支配籌備各事宜籌議條復在案茲由騰返榆蒙雲趙各屬紳民重申前請並據分別繪具圖說前來詳加披閱改建之議有不容於或緩者當派令林永志恂張倬文運楊牧贊東朱牧廷銓路令承熙李令治等會同各屬紳民將各插花地段接壤界址詳晰履勘呈覆源復加審核於地理上天然之界限及行政上施行之便利參伍鈎稽詳爲釐訂彌渡爲趙州屬九里地方距州城已百里由彌渡直出盡其境尙有百餘里原設通判名司督捕實則備員命盜訴訟必赴趙州征

收錢糧必另派書設櫃官民交困措治已難蒙雲兩屬之地錯出其間舛午糾紛不可究詰奸狡之民因而弊混大非行政所宜今設專官將插花地土歸併爲一官治民生皆蒙其利縣治即設通判駐所名彌渡縣設知縣一員省原設通判以其公費爲知縣公費惟大理府屬凡七州縣轄境已廣彌渡去蒙化僅一日程交通便而考核易擬請改隸蒙化直隸廳以劑其宜趙州屬境既劃彌渡區域稍小查與趙州近接之賓川屬海東海南兩旗均在趙州東北五十里以內距賓川則百有餘里卽以劃歸趙州亦稱近便賓川地面本寬劃後無嫌狹小雲南縣屬境插在彌渡境內者應歸彌渡外又賓屬之蛟起謝家二營及雲屬之感香化里二村皆於彌渡邊界爲近其外復有蒙三約亦以併同改歸彌渡爲便漾濞本蒙化分防地在蒙化西北二百餘里中隔趙州西界一段地當衝要任重權微無以出治由漾濞至永平縣計程三站爲迤西衝衢餉犯過境押解尤艱其地紳民請改設縣官俾一切詞訟易於赴訴籲請已屢惟境地無多擬定自漾濞江起下至合江四十里橋與趙州分界再順江直下至盤龍寺山與順寧

分界并劃永平縣屬之太平鋪等以益之由勝備橋分界再由橋河溯流而上有雲龍浪穹兩屬插花地一併附入復折至漾濞江上流止東西相距百五六十里南北相距三百餘里改漾濞巡檢爲漾濞縣設知縣一員公費視簡缺知縣支給仍隸蒙化以便維制永平東界甚寬今劃出太平鋪等處其由勝備橋至縣治尙有百里查永昌府分防之杉木和巡檢距永平僅七十里去永昌則百餘里中隔瀾滄江實形不便擬將杉木和改隸永平即以滄江爲界庶幾永平漾濞兩縣地土皆劑均平且各縣治地皆適中綏馭旣稱便利各以江河爲界輻輳無自而生惟改建事宜須先委員試辦庶劃勘設置責有專歸戶口錢糧亦易得實彌渡通判張倅文運人頗勤明擬卽責成籌辦改建事宜俟奉准後再行改委署理縣事漾濞縣缺擬調定遠縣彭令坤年署理所遺定遠縣缺請以本部一等書記官朱沛霖接署彌渡縣印前已由省刊發帶榆漾濞縣印擬請先由榆刊發一俟省印頒到再令繳銷至以上改建各端本應俟將圖冊送省核定再行辦理惟念紳民望治情意甚殷彌議改縣已近三年迄無定議漾濞當蹂躪之

後撫字尤亟必將圖冊送省道遠不易參稽又待派員覆勘往返尤耗時日經費虛糜猶其餘事似不若取決輿情就近辦理以慰民望而歸簡捷源於部署完竣亦得早日釋肩是否有當伏乞迅賜核示遵行師長根源叩文印

行營李師長鑒文電悉所陳各節係爲因地制宜便於治理起見計劃勻撥均極周妥應卽照准辦理惟漾濞一縣戶口恐嫌過少似應再行增益希酌核電復以便咨省議會知照所調之定遠縣彭令坤年業已因事撤省另委程煥文前往接署所有新設漾濞縣缺就近遴員請委可也都督府治印

省城軍都督府鈞鑒治電奉悉漾濞一縣綜計戶口誠苦其稀現劃區域已覺其廣昨集官紳參稽圖冊區分支配深費躊躇將增戶籍而廓版圖地廣而荒益難治理再查所劃區內如舊隸永平之上街地附治所蒙屬之平坡亦止三十里貿易尙盛戶口亦稠近來絲業日見發達儻於繁盛之區振興實業荒曠之地招集開墾設縣之始紳民望治甚殷提倡尤易爲力如尙有可以籌劃更定之處擬飭新任到後會同紳耆妥爲

勘畫籌議再行核定惟籌措一切非幹員不能勝任查有新委趙州知州杜澍才力精幹通達治體擬請調署漾濞縣以資創辦所遺趙州缺查有師司令部一等書記官朱沛霖任事實心堪以委署如蒙俞允卽由源處給委是否有當伏候示遵師長根源叩
篠印

李師長鑒篠電悉所請以杜澍調署漾濞縣事遺缺趙州以朱沛霖署理呈奉都督批准註冊給狀請卽先行飭赴任都督府政敬印

省城軍政部鑒彌渡漾濞改設縣治經始之際一切建置需款甚殷迭經分飭該兩屬官紳妥爲籌集茲查所需經費除履勘疆界調查戶口田畝糧賦及地方興辦事項統歸該地方擔任自行籌措外惟興修監獄倉廩及葺補衙署各款地方無力擔負自應由公家籌給以資興舉昨飭各該縣核實估計以憑撥發茲據彌渡縣張令來文約需銀式千兩漾濞縣杜令來文亦需銀式千餘兩核計所估數目雖尙覈實惟現在公帑支絀恐難悉數應付擬再量予核減該兩縣各發銀一千兩飭令樽節開支如果實有

不敷由地方設法彌補惟監獄倉儲等項均設縣後不能延緩之務應請飭財政司迅速核議俟覆准後即就近由蒙化下關厘金分別撥給俾得剋期興建且免兌解之煩如何之處統希示復根源叩青印

爲轉呈事案據漾濞縣紳耆田鐘農熊朝棟等呈稱竊查滿清提督丁槐生性刻薄貪鄙無恥夤緣當道官擢一品所至之處均以擄掠姦淫搥詐爲事其任騰越總兵永昌副將時婪索土司無惡不作吾滇父老猶能歷歷言之前平回亂騰越永昌永平漾濞叛產均經清總督岑毓英立案不准私買私賣賞給受傷殘廢兵勇十年後仍歸大公該丁槐朦上欺下殘廢兵勇工畝未給竟將各屬叛產霸爲私有兵民飲恨莫奈伊何所有霸據漾濞叛田叁百伍陸拾畝山產十餘處庄房壹百五十壹隔共計年收租谷貳百零八石清油貳千觔房租錢壹百伍拾千文其待遇佃戶尤屬苛虐每收租時須三過風箱尖收平賣殘毒同胞慘無天日茲值反正該弟兄坐擁厚貲即不能盡解貧囊以濟時難當此公帑奇絀民生窮蹙亦應竭力報効漾濞荷蒙改縣開辦需貲民貧

地瘠籌措維難理合公呈請祈轉呈軍都督府轉飭丁鎮台將伊弟霸據漾濞叛產全數撥還地方以作設縣開辦常年各經費紳等係爲公益起見伏乞作主施行等情據此查該紳等所陳各節係爲地方起見理合備文轉呈鈞府俯賜查核咨臨時省議會核議并飭丁鎮遵照辦理此呈

省城軍都督府鈞鑒查漾濞現劃地面戶口似覺稀少前奉鈞府治電經飭杜令到任後妥爲勘劃酌量增益在案茲據該令稟稱蒙化屬之鼠街一帶人戶繁盛距漾濞僅只百里擬請劃歸漾屬惟既添劃鼠街則合江上游對面趙州所屬山地亦應劃歸漾濞以免插花而便治理乞批示飭遵等語除令飭該廳州縣會同商酌妥爲勘劃總期於各州縣均無窒碍外謹陳並祈飭部備案根源叩支印

省城軍都督府鈞鑒前據順甯張守稟稱順甯縣屬之六塘廠狗街魯史等處距順三四百里聲息阻隔治理維艱該各處均與永平緊相連接距永城僅六七十里若劃歸永平縣管理較爲便宜等語現據永紳到榆詢稱各情與該守所陳相同並稱永平自

上街等地劃歸漾濞後地面較前甚狹若益以順屬六塘廠狗街魯史等處境治亦不慮其寥闊經師長覆查無異除電飭張守李令即行遵照協同勘劃繪具圖說詳造戶口糧稅各冊分別報查註案外合先電陳師長根源叩有印

省城軍都督府鈞鑒前具有電請以順甯縣屬黃庄里之六塘廠狗街魯史等處劃歸永平縣管理在案茲細查魯史原屬順屬之觀音里請仍舊毋庸劃撥專撥黃庄里所屬各處地方爲宜謹電陳明師長根源叩先印

一件批雲南縣自治公所呈蒙化插花地劃歸彌渡種種不便請派委勘劃文

呈圖均悉查彌渡漾濞兩處改設縣治其間插花地段接壤界址曾經迭飭各屬官紳先行分割支配復飭派蒙化彌渡賓川趙州雲縣永平各廳州縣呈覆經本師長覆加審核於地理上天然之界限及行政上施行之便利參互鉤稽詳爲釐訂是該兩處之改設縣治劃併地方皆由各屬地方官公同擬議者並非一州一邑個人之私見所爲之也來文既指爲彌蒙劣紳又加以私相聯絡夫一縣之疆域沿革何所與於彌蒙之

劣紳而彌蒙之劣紳又何所爲而私相聯絡立言若是已不可解且蒙三約原屬蒙化茲以其距蒙遠而與彌渡近故以昔日之直隸於廳者劃而歸於所屬之彌渡以收治理便利之效而仍無改於疆域之舊形使勢利不得謂爲風馬牛之不相及且彌旣設治凡劃歸管轄土地無一非別屬土地若皆出而爭之尙復成何事體况蒙三約則昔本蒙地今仍蒙屬尤與別屬不同又如所謂蒙三約與東南鄉人民閭閻相望溝洫相通一應習慣互有關係等語詎知該處前非縣屬今撥歸彌治亦非縣屬此中旣無區別是原有關係者仍有關係亦何得失之有又謂自治團體而論蒙三約與東南鄉比屋而居異日自治團體成立爲衛生教育警察公共營業彼此均受利益夫一省之內數十州縣星羅碁布彼壤地相望鷄犬相聞者何在箴有地方習慣行政亦何在而無關係將必舉其有關係者而胥劃併之乃爲利益吾見其窮於術矣又謂蒙三約爲藏垢納污之藪設劃歸彌渡則東南鄉難保不受其擾害查該處從前歸之廳屬或難遙制今劃歸彌治程途僅七八十里朝發夕至自無鞭長莫及之虞又謂以道路遠近論